

TARIKH : 19 JULAI 2022
AKHBAR : BERITA HARIAN
MUKA SURAT : 2

Kerajaan cari kaedah paling sesuai rangka subsidi bersasar

Sidang Dewan Rakyat

Kerajaan cari kaedah paling sesuai rangka subsidi bersasar

Langkah elak ketirisan, tiada rakyat layak tercicir

Oleh Zanariah Abd Mutalib dan Suzalina Halid
bhnews@bh.com.my

Kuala Lumpur: Kerajaan sedang mencari mekanisme paling sesuai dalam merangka subsidi bersasar untuk rakyat yang berhak menerimanya, sekali gus mengelak tiada ketirisan dan golongan itu yang tertinggal.

Perdana Menteri, Datuk Seri Ismail Sabri Yaakob, berkata mekanisme itu memerlukan perincian dan bukan sesuatu yang mudah untuk ditentukan.

"Cadangan subsidi bersasar bukan sekarang, sebaliknya sejak be-

berapa kerajaan sebelum ini lagi, tetapi masih belum boleh dilaksanakan kerana belum ada mekanisme khusus untuk pastikan tidak ada rakyat tercicir dan tertinggal.

"(Sebagai contoh), adakah kita perlu membeli gula atau minyak masak menggunakan kupon?"

"Adakah kupon boleh digunakan atau menggunakan MyKad untuk membeli dan sebagainya. Ini yang sedang kita perincikan.

"Kita akan bantangkan di sini, apakah cara yang kita gunakan untuk subsidi bersasar ini," katanya pada sesi Pertanyaan Bagi Jawab Lisan di Dewan Rakyat, semalam.

Beliau menjawab soalan tambahan Datuk Seri Anwar Ibrahim (PH-Port Dickson) yang bertanya tindakan kerajaan untuk menangani kenaikan kos sara hidup rakyat kerana mendakwa kerajaan mengambil pendekatan konvensional dan tidak ada persediaan untuk melakukan perubahan struktur.

Menceritakan pengalamannya


ketika bertugas sebagai Menteri Perdagangan Dalam Negeri dan Hal Ehwal Pengguna (KPDNHEP), Ismail Sabri berkata, banyak persoalan timbul ketika mekanisme ditetapkan bagi pemberian subsidi bersasar untuk petrol RON95.

"Siapa yang layak dapat, kita kata kereta 2,000cc ke bawah, jadi pelbagai isu timbul mengenainya. Sebagai contoh, seorang imam kampung memakai Volvo lebih 2,000cc yang mana tidak boleh mendapat subsidi, tetapi harga kereta itu RM10,000.

Subsidi lebih RM77 bilion

"Ada kereta mini yang kecil berharga ratusan ribu, tetapi layak mendapat subsidi kerana di bawah 2,000cc. Jadi, ini antara perkara perlu diperincikan," katanya.

Menjawab soalan asal Anwar mengenai langkah diambil untuk menangani kenaikan kos sara hidup, Perdana Menteri berkata, komitmen kerajaan dibuktikan dengan meningkatkan peruntukan subsidi kepada lebih RM77 bilion,



Ismail Sabri ketika menjawab soalan pada Sidang Dewan Rakyat di Bangunan Parlimen, semalam. (Foto BERNAMA)

berbanding peruntukan asal RM31 bilion bagi 2020.

Katanya, daripada jumlah ini, RM1.1 bilion diperuntukkan kepada subsidi ayam dan telur, menunjukkan kesungguhan kerajaan membantunya rakyat.

"Sekarang kita melihat hasilnya, harga sudah mula stabil. Melalui cerapan data harga mingguan, kerajaan mendapati kesan positif kerana harga ayam sebenarnya berada di bawah harga kawalan RM9.40 bagi Semenanjung.

"Harga purata nasional mingguan sehingga 9 Julai lalu adalah RM9.22 dan Pahang merekodkan harga terendah sebanyak RM8.95," katanya.

Perdana Menteri berkata, selain memberi subsidi, kerajaan menambah nilai Bantuan Keluarga Malaysia (BKM) dan sehingga kini, jumlah maksimum diterima B40 sebanyak RM2,600 setahun.

"Insya Allah, kita akan tengok ke-

adaan, jika perlu kita naikkan dan kalau harga barang sudah stabil, kita tidak naikkan lagi," katanya.

Sementara itu, Ismail Sabri berkata, kerajaan sedang melaksanakan audit terhadap kilang pembungkusan minyak masak paket bagi memastikan bekalan bahan keperluan itu tidak terus diseleweng, termasuk dijual ke negara jiran.

Beliau berkata, ia antara tindakan dilaksanakan bermula daripada punca minyak masak itu dikeluarkan.

"Kita audit pengilang pembungkus minyak paket, dapatkan perincian pembeli, siapa penerima dan nama pembekal bagi mengelak penyelewengan.

"Kita akan lihat ke mana minyak masak itu dihantar. Kita akan dapatkan nama dan periksa dengan pembekal jumlah diperoleh sebab kadangkala ia tidak sampai kepada pembekal, sebaliknya dari kilang dibawa ke lain," katanya.